

Thursday, July 31, 2025

Time - 2:30pm - 2:35pm

AKASHVANI AIZAWL

REGIONAL NEWS UNIT

60th FOUNDATION DAY OF AKASHVANI AIZAWL

Vawiin hi Akashvani Aizawl din kum 60-na a ni a, he ni pual hian Akashvani Aizawl Multipurpose Hall Tuikhuahtlangah lawmna hun hman a ni ang.

SFX.. Akashvani Aizawl

Vawiina hun hman tur hi Akashvani leh Doordarshan Additional Director General (Northeast Zone) Pu Ashish Bhatnagar an khuallian niin a hmanpui dawn a, Akashvani Aizawl Director leh Mizoram Cluster Head Pu DR Lalropuia pawhin thu a sawi dawn bakah Assistant Director (Programme) Pu Biakchungnunga leh Assistant Director (News) Pu Gin Gangte ten thu an sawi dawn a, Doordarshan News Director Pu Nampibou Marinmai leh I&PR Joint Director Pi Mina Zoliani te pawhin thu a sawi dawn a ni.

Vawiina hun hmanah hian tunhnaia Emmy Award dawng Akashvani Aizawl News Editor pahnih HC Vanlalruata leh Isaac Zoramsanga te chu ADG Pu Ashish Bhatnagar an lawmpuina a hlan dawn a, zai leh lam nen hun hlimawm tak hman tura ruahman a ni.

Tun dinhmunah Akashvani Aizawl ah hian thawktu mi 170 an awm mek a, a ngheta thawk mi 50 leh a nghetlo a thawk mi 120 an awm mek a ni.



NATIONAL EDUCATION POLICY

Mizoram chu National Education Policy (NEP) 2020 a taka kalpui kawngah hma la tha pawl a ni.

National Education Policy kum 5 tlin puala Akashvani Regional News Unit, Aizawlin a kawmnaah, Dr K Vanlalhrulaitluanga, Guest Faculty, Deptt of Economics, PUC chuan Mizoram chu NEP 2020 a taka kalpui kawngah hma a la tha hle a ti a. SCERT pawhin NEP chu tualchhung milin rang takin a her rem nghal a, Mizoram University pawh ram chhunga Central University zingah NEP a taka kalpui kawnga hmala hmasa ber pawl a ni tih sawiin, CUET pawh MZU leh Pachhunga University te chu a hmang hmasa pawl an ni a ti bawh.

Dr K Vanlalhrulaitluanga chuan ram puma zirna chu tunlai thiamna lam hawia her rem chhoh a ngaih avangin ngaihtuahna chik zawk a awm theihna atan inkaihhruaina tha zawk a awm theih nan NEP 2020 chu siam a ni a ti a, NEP 2020 ah mahni pianpui tawng ngaihpaawimawh a tul rualin hnamdangte nen inpawl hova

in chenchilh tur chuan mahni tawng tualleng anga saptawng thiam leh Hindi thiam tura inzirtir pawimawh a tih thu a sawi a, inkalpawhna leh inbiakpawhna tha a awm theih nan state sorkar pawhin hmalakna mumal tak a neih a ngai a tih thu a sawi bawk.



SOCIAL WELFARE MINISTER

Social Welfare Minister Pi Lalrinpuii’n Mizoram sawrkar chuan ruihhlo do chu a ngai pawimawh takzet tih sawiin ruihhlo do leh a ngawlvei enkawlna kawngah theitawp a chhuah mek zel tiha sawi.

He thu hi State Social Welfare & Rehabilitation Centre, Maumual, Chanmari nimin piaha a tlawhna ah sawiin Minister chuan sawrkarna an chelh atangin ruihhlo do chu an ngai pawimawh hle a ti a, sawrkar mai nilo, khawtlang leh mimal tin te tanrual a ngai tih sawiin mipuite thawhho puiah a sawi a ni.

Pi Lalrinpuii chuan ruihhlo enkawlna hmuna awm mek ten lei rem an rah theih nan theihtawp an chhuah thin a ti a, enkawl mek te chu ruihhlo an sim bakah an chhuah hnua kawng dik an zawh zel theih nan zirtir an ni tih sawiin enkawl mek te chu tumruhna nen theihtawp chhuah zel turin a ngen tih a sawi.

Minister chuan chhungkua atanga inzirtirna a ngaih pawimawh thu sawiin mahni fa te theuh zirtir kawngah mi tin te tan la thar turin a chah a, ruihhlo ngai mek te chu hmangaih an ngai tih sawiin kawng dik an zawh theih nana kawng tha kawhhmuh chu mi tin te tih makmawh ani tih a sawi bawk.

State Social Welfare & Rehabilitation Centre ah hian staff 24, hmeichhia 17 leh mipa 7 an awm mek a, a awm hun chhung hi thla 7 niin Centre atanga thiamthil an zir hmanga eizawna tha leh nunphung pangaia an nun leh theih nan theihtawp chhuah thin a ni.



AIR NEWS ON SOCIAL MEDIA

Chanchinthar hi Akashvani Aizawl atanga puan a ni a. AIR News Aizawl Youtube Channel, All India Radio News Aizawl Facebook page leh newsonair.gov.in ah te chanchinthar hi ngaihthlak leh chhiar theih a dah a ni.

Zanin dar 6 leh a chanve-ah Chanchinthar puan leh a ni ang.



E-RAM PORTAL

Land Revenue & Settlement Minister Pu B. Lalchhanzova’n tun hmaa LSC tia hriat thin Record of Rights chu mipuite tana thil pawimawh tak tur, nakkin thlenga Mizoram hmasawna bung thar, hriat reng tawh tur a ni a ti.

He thu hi tunkara e-RAM portal kaltlanga Digitally-signed ROR (LSC) mi 2 hnena a hlanna ah sawiin Minister chuan ram lei leh hralhte chu kalphung buaithlak tak nia mipui thinlunga lo awm tawhte pawh, e-RAM portal leh Department hnuaia Tax Payment Portal-te mipuiin uar zawka an hman hunah chuan awlsam taka tih

zung zung theih a ni ta chuan mipuite thinlung pawh a tha zawnga a thlak ngei a beisei tih a sawi a ni.

E-RAM portal hmang hian mipui ten awlsam zawk leh online-in ram teh, hming thlak, ram then leh dilna hrang hrang an theh luhte chu a hmasak dan indawt zela buaipui thin a ni a, Land recording fee leh a tul dangte tihfel hnua h diltute mobile phone-ah download mai theihin digitally-signed LSC/ROR hi pek chhuah thin a ni dawn a ni.



DRUGS SEIZED

Excise and Narcotics Department leh CADS tangkawp chuan nimin khan Ruantlang-ah Heroin hawng 29 leh a neitu-a puh hmeichhe pahnih man an ni.

Excise & Narcotics Department leh hnuaia ruihhlo dotu, CADS thawk dun chuan nimin chhun dar 12:30 khan Champhai District-a Ruantlang-ah Heroin hawng 29 (Gram 350) leh a neitu-a Lalneihkimi, Ruantlang leh Vanlaldini (kum 25) Zimte, Myanmar, tuna Uilui, Melbuk-a khawsa nia inchhalte chu an man a. An pahnih hian ND&PS Act hmanga thubu ai siamsak an ni.

